

欽定大清會典事例

欽定大清會典事例卷八十八

吏部

處分例

各部院事件限期
直省承辦

稽查八旗事件
欽部事件限

期

各部院事件限期○順治十二年

諭事下部議者限十日內具奏。須咨會各衙門者限二十日內具奏。其事關刑名錢穀不能如限即結者先期題明。○十三年議准。事由本衙門覆奏者限二十日。由咨會各衙門覆奏者限一箇月。如有限內難結事情聽該衙門豫行題明展限。○康熙四

十六年定。部院事務。每月將已完結及未完結之處。造冊分送六科。科鈔並現理事事件。造冊分送各道。勘對限期。有遲延違誤者。查叅。將遲誤之人。照遲延例。分別議處。註銷冊內。遺漏事件者。照失察案件例。罰俸兩月。行查月日。難結情由。不行聲明。及已經聲明。尚有舛錯蒙混者。照行查未結概稱已結。註銷例。罰俸三月。○又議准各部院承辦科鈔事件。凡行詢各部及外省。不能依限完結者。於每月註銷冊內。將行查緣由。逐一聲明。如有行查未結之案。概稱完結。註

銷者查出將承辦註銷之人照文卷舛錯例議處。○雍正元年

諭戶部事。繁科鈔限三十日。會稿限四十日。○又覆准

各部院繕譯筆帖式於漢字稿既定後限一日即行繕譯。繁難者限二日。具稿呈堂。倘有誤承辦事件記過一次。再有犯者將該筆帖式即行革退。倘有串通經承洩漏招搖等弊將該筆帖式與經承一例治罪。○又覆准定例。部院衙門案件皆有二十日限。嗣後各部院堂司皆立用印檔案事件一到即行定稿。定稿後即行繕譯。

說堂不得彼此推諉。觀望堂號簿用堂印。司號簿用司印。以便稽察。○二年

諭。凡交下速議事件。限五日內完結。○五年

諭。議政大臣九卿各部院衙門八旗將應奏事件。遲延者甚多。從來寬定期限者。特為難辦之事。應待行查。有需時日故耳。今看三兩日內可以完結之易事。亦謂尚未及限。怠慢推諉。不即辦理具奏。及至屆限。始行具奏。與原定期限之意。實屬相違。凡事應隨到隨即辦理完結。乃將並非難辦之事。稽延時日。此不過從中作弊。以為請託之地而已。毫無裨益。著議政大

臣九卿將易於辦理事務。作何另定限期之處。詳細議奏。欽此。遵

旨議定。嗣後除兩衙門會稿。八旗會議。仍照定限完結外。一應不待查覈易於辦理事件。如吏禮兵刑工等衙門。向例二十日完結者。今定限十日完結。戶部向例三十日完結者。今定限二十日完結。其八旗及當月旗分。所辦易結事件。俱定限十日完結。至議政及九卿會議。向無定限。嗣後如有行查事件。定限三十日完結。不待行查易完之事。限十日完結。定限之後。儻仍有怠緩遲

延互相推諉。以致違限未結者。內閣科道查出糾參。照例議處。再兩衙門會稿。雖有定限。但止有主稿衙門逾限處分。以致稿案吞送去後。會稿衙門。往往任意遲延。嗣後會稿移送之處。定限十日送回。如逾限不行送回。主稿衙門。即知會科道等題參。○十二年定。部院一切應行文字事件。均於到司五日之內。即令行文。其有訛誤舛錯之處。未經查出者。將專管直日之漢司官。照文卷舛錯例議處。至應行文事件。遺漏未行。或遲延日久。滿漢各官。均難辭咎。應將滿漢各

官一併查叅遺漏未行者照例罰俸兩月再各部院衙門彼此文移均兼清漢嗣後如字內有舛錯訛誤之處未經查出並將專管直日之滿洲司官照例議處○又議准各部院咨文事件於文到之日該司務廳按日登記號簿呈堂標到部日期分發各司該司又按每日所收咨文註明日期定稿即將原咨黏連稿後並於稿內將咨文到司日期註明如有辦理遲延者該堂官計日扣限易於稽查如有行查各衙門者亦令按次詳載以憑查覈○乾隆四年覆准凡部

院將應結之事。故為駁詰者。各該稽查之科道衙門。即行叅奏。交部將該司官罰俸六月。堂官罰俸三月。○又議准。凡議敘案件。一案之中有一二字重複錯誤。原卷可以查明者。即查明改正。准予議敘。不得藉端駁詰。及巧為需索。如有濫行駁詰者。將承辦之員。查明題叅。照故為駁詰例議處。如有不肖官吏。藉此需索者。訪明嚴叅。交部治罪。○五年議准。各衙門具題事件。以交繕本處日期為止。九卿會議事件。以九卿上班日期為止。如應行查者。承辦衙門除去咨詢

日期。按限完結。遲延一日至十日者。罰俸一月。十日以上。罰俸三月。二十日以上。罰俸六月。三十日以上。罰俸一年。該堂官於屬官逾限事件。自行查叅者免議。儻有逾限既未完結。又未查叅。經別衙門查叅。如承辦官罰俸一月者。堂官免議。承辦官罰俸三月者。堂官罰俸一月。承辦官罰俸六月者。堂官罰俸三月。承辦官罰俸一年者。堂官罰俸六月。○十四年

諭。嗣後各都事件。在本部題結者。吏禮兵工等部。及各衙門。均定限二十日。戶刑二部。定限三十日。行查會

稿係吏禮兵工及各衙門主稿者。定限四十日。戶刑
二部。定限五十日。內所會各衙門。各定限五日。戶刑
二部。定限十日。逾限即行叅處。○十五年

諭。嗣後各該衙門支領文移。遇有不兼清漢。及一切應
駁事件。皆令收文之員。回明堂官。移查本處。並將移
文之員。留待咨覆。收文處不得隨收隨駁。無可稽考。
如此則查覈尤為詳密。而作偽者無所容。將此永著
為例。○十六年覆准。各衙門如有自行奏准工程及
事非尋常。係格外支領等項。務將辦理緣由。備
具清漢文移。報明戶部。戶部驗確。即知會該衙

門。出具印領。委官齋赴戶部覈對相符。然後劄庫給發。○十七年議准。部院衙門各司屬中移付事件。凡有關題奏等案。均照各衙門會稿定限移覆。付督催所稽查。照例註銷。○二十九年覆准。各部院衙門封印期內。各省投到公文。仍令各提塘照常隨時投遞。標寫開印日期發司。緊要者隨時趕辦。如係尋常事件。次第查案辦稿。○又奏准。各部會稿。有應送數衙門會議者。主稿衙門。即一面查辦。一面將所會各衙門事理。分繕副稿。同日咨送會議。俱令依限送回。仍

於註銷冊內。將會稿定議日期。逐一詳開。移會
科道。以便查覈。會稿內有關現任文武官員實
降實革者。主稿衙門。於會齊之後。限五日內即
行具題。刑部題案繁多。限十日具題。仍將出本
日期。按月造冊。交科道稽查。○三十年奏准。戶
部承辦奏銷案件。於科鈔到部日。限十日內。先
將應行查覈款項。摘出呈堂。行文各衙門查覈。
一面將不待行查款項。逐一詳悉覈算明確。即
行具稿呈堂辦理。俟各衙門咨覆到齊之日。一
併敘入稿內。如有遲延。該堂官即將遲延之司

員查叅。至行查各衙門。逾限不行查覆者。亦令該堂官將該司員查叅。○又奏准各部司員。係已仕歷任者。遇有會稿事件。令其辦理。儻係初任之員。務於一年後。稍諳部務。方准承辦。如未滿一年。果能辦事無誤。亦必經該堂官派出。准其一體辦理。儻互相推諉。仍令初選不諳之員承辦。以致事有舛錯。應將該司推諉之滿漢司員。照推諉事件例。罰俸一年。○三十二年。覆准各部院衙門。應題事件。吏禮兵三部。專題案件。呈堂定議後。即於二十日限內。交本房繕本。交

本房後限十日內具題。彙題案件均於交本房後限二十日內具題。戶部題本於交本房後限二十五日內具題。刑部專題彙題案件於交本房後限五十日內具題。工部題本於交本房後限三十日內具題。都察院以及事簡各衙門專題彙題案件俱於交本房後限十日內具題。彙題案件交本房後如有應送會稿衙門更改事故者照限扣展。各衙門具題時適屆限滿遇例不進本日期仍按日扣除。刑部叅案立決情罪重大案件應即時趕辦具題。禮部題本案件有

各省壽民壽婦本章酌留二三件以備

御門恭進均毋庸定限。○三十七年奏准刑部現審尋常案件如遇鞠訊難結之事呈堂時適已屆限堂官內未能畫全者即將未曾畫全緣由於冊內聲明准入註銷俟完竣行文後於下次註銷時知照科道查覈。○四十五年奏准吏部承辦議敘議處彙題案件有十日一月半月盜案之別每題一次自一百件至二百件不等除堂畫小稿及繕本各限期仍照例扣算外其彙辦行文行付註冊繕清查抵加級紀錄各事宜

統限以三十日辦竣。即交與檔房繕本具題。○
五十五年奏准在京各部院衙門行查事件。單
片聲覆者。如查例及現辦易覆各案。限五日咨
覆。辦稿呈堂聲覆者。如查覈錢糧及遠年舊事
雜覆各案。吏禮兵工四部。限十日咨覆。戶刑二
部。限十五日咨覆。○五十六年奏准各部院會
稿內。如文武各員。均應議處。其一人任內。僅止
會銜。無關處分者。均令主稿衙門查註各兼銜。
毋庸會議。○又

諭。向來戶刑二部。案件繁多。定例題本限期較寬。但查

覈錢糧。研求情罪。雖比別部事件。稍需時日。亦不宜過於稽緩。嗣後戶刑二部題本。俱著統以八十日為限。刑部八九兩月應題之本。仍准照百日之限。其各部題本限期。俱照舊例辦理。毋任遲延。○嘉慶五年。奏准部院衙門。一切先行及專題事件。俱限五日內行文。彙題事件。限一月內行文。如有遲延。照在京衙門事件遲延例議處。○八年。

諭。近來各部院衙門承辦事件。每有遲延。昨日朕偶思及通政司參議誠存。早經加恩議敘。何以日久未據該部具題。諭令軍機大臣查明覆奏。茲據奏稱此件。

諭旨。自四月初三日傳鈔到部。吏部於初八日定稿。移文繕書房。繕譯諭旨。至二十二日經繕書房繕出。交部。二十九日送交本房繕寫等語。此等議敘之本。有何難辦。既無須輾轉行查。多為商酌。何以必待頂限。始行具題耶。乃繕書房遲至十五日。而吏部承辦司員。又不趕緊交辦。復遲六日始交本房繕寫。雖未逾定限。究屬因循疲玩。著將繕書房及吏部承辦各員。交各該衙門察議。其管理繕書房及吏部各堂官。俱著分別察議。嗣後各部院衙門。辦理題奏事件。固須詳慎。但必當督飭承辦之員。認真趕辦。毋任稽延。

致滋曠廢。將此通諭各部院衙門知之。○九年

諭。御史王瑤臺奏請定升遷人員引見限期。以防流弊。所奏甚是。各衙門升遷員缺。事關職守。豈得任意遲緩。此後各衙門出缺引見。以及外省送部引見人員。著該部酌定限期。以杜流弊。仍隨時知照稽察各衙門。如有逾限。即行叅處。示儆。欽此。遵

旨議定。嗣後除滿漢月官月選筆帖式。各省保薦俸滿教職及現任人員升補。有關開缺者。各按截缺日期。先期帶領引

見外。至在京各衙門應行題補之缺。出缺後限二十

日內帶領。如有須行查者。酌寬十日。定限三十日內帶領。再內外雜項人員。到部驗到後。統限二十日內帶領。其有須行查者。亦酌寬十日。定以三十日內帶領。其雜項人員。隨時驗到。積至一二十員。即作為一班。儘數帶領。設人數過多。不能按限儘數帶領者。總以有關積缺開缺人員。先儘引。

見至應行帶領人員內。有驗到後。呈報事故。或遇直日推班。並封印日期。不能帶領引。

見者。仍將詳細緣由。移咨稽查衙門查覆。其各衙門

應行帶領引

見之員均定限在三十日之內。如有不能依限帶領之處亦即自行知照稽察各衙門以憑查覈○

十年

諭據兵部彙題議覆盜案等項尋常事件一本向來吏兵二部於此等議覆各案俱歸入彙題本內或十日具題一次或十五日具題一次即遇有特旨交議事件亦並不另本題覆以致本內臚列案件紛繁多者篇幅盈尺少者數百頁朕披覽章疏固不厭繁多而部中於應辦事件積壓遲延久懸案牘殊非慎重辦

公之道。即如本內議敘司鑰長舒隆阿。拏獲書吏陳瑞華偷盜印冊一案。係於三月十六日經奕紹具奏。奉旨特交議敘之件。迄今已閱三月。始據歸入彙題案內。議覆實屬任意遲緩。試思此等議敘案件。非如議處各案。尚須輾轉咨查。致稽時日者。可比嗣後吏兵二部。於尋常交議案件。固不得怠緩遲逾。若有特旨交議案件。或專摺具奏。或另為一本。及早議覆。不得歸入彙題本內。併案辦理。以致因循延閣。若再有特旨交議歸入彙題者。該堂司各員。一併嚴議。著為令。欽此。遵。

旨議准將承辦此案之司員罰俸三月。堂官罰俸一月。

○十一年

諭嗣後吏部等衙門遇有特旨交議之件該堂官等止須將該員應得降級罰俸處分查覈例案定議具奏並於摺內聲明係奉特旨交議之件毋庸查取加級紀錄議抵俟奏上時朕覈其情節輕重量予區分其加恩准抵者於奉旨後再將該員有無加級紀錄詳覈彙題該堂官等不得仍以吞查為詞藉端遲滯儻復任意延閣必將該堂官懲處不貸○又

諭吏部具題湖南嶽麓書院掌教羅典主講又屆六年

照例准其紀錄二次一本已依議行矣此係十月初九日批交該部議奏之摺距今已及一月此等照例議敘掌教之件止須遵照上次成案予以紀錄二次毋庸輾轉咨查何至稽延一月之久始行繕本具題殊屬延緩所有吏部堂官著傳旨申飭嗣後各部院衙門遇有特交事件俱著隨時具摺覆奏不得延至頂限之期始行具題○又奏准凡奉

特旨交議事件除宗人府內務府各官有無加級紀錄等項必須行文咨取者先將該員應得降罰處分定擬具奏俟

命下之日。移咨辦理外。至各部院以及各省大小官員。向有冊檔可稽者。仍將該員有無加級紀錄革職留任之處。隨摺聲敘。俟奉

旨後。將准抵者。即行註冊。其不准抵者。即行開缺。○又奏准。八旗官員俸米冊檔具領。於每上月初十日內送部。八旗甲米並家口冊檔具領。於每月十五日內送部。如有逾限。照造冊遲延例議處。倉場限兩月內放完俸米。一月內放完甲米。仍將各旗送檔。戶部劄倉各倉開放月日。咨明都察院查覈。如有逾限。係何衙門遲延。查明參

奏。至補領米糧。於割倉之日。限十日放完。交查
旗御史。就近稽查。如限內不完。將監督並監放
米石旗員議處。違限一日至十日者。罰俸一月。
十日以上者。罰俸三月。二十日以上者。罰俸六
月。一月以上者。罰俸一年。兩月以上者。罰俸二
年。凡官兵俸餉。亦照此例辦理。○十四年

諭。現屆封印日期不遠。各衙門自應將應辦事件。上緊
趕辦。次第陳奏。庶不致有積壓之慮。乃本日悅心殿
傳膳辦事。止有步軍統領衙門封奏一件。此外六部
俱不奏事。將來封印期迫。勢必至一日之內。紛紛陳

奏轉多擁擠。殊非辦公之道。嗣後各衙門務將應辦事件。隨時上緊陳奏。毋得仍前延緩。○十六年奏准各衙門滿漢各官應題之缺。查數到部時。吏部以堂到後發司之日起。文選司限五日內具稿呈堂。堂官亦限五日內畫齊。扣滿十日行文。不得故違。亦不得少速。以杜積壓之弊。儻有不合例事故。例應駁查本衙門者。以後次咨到之日。另行起限。各衙門於出缺之日起。限十日內查數過部。吏部按限查覆。各衙門限十日內帶領引見。前後統限二十日。仍於引

見後將日期知照吏部及稽查各衙門。查明有無往返駁查日期。如有遲延。即查取職名議處。○十八年

諭。嗣後部中題奏事件。著照該御史所奏。將科鈔咨文何日到部。該衙門何日具題。俱於本尾聲明。如有遲延。即行附參。至題本奉旨後行文。以及咨行外省事。件。著各衙門設立號簿登記。如有遲延。分別記過參處。○二十二年

諭。向來部院遇有議處事件。每因查被議之員。有無加級紀錄。以致議奏遲延。嗣後著於奉旨五日之內。即

行議上。其例不准抵者。於摺尾聲明。即係應以級紀議抵者。亦毋庸先行查計。著於摺尾聲敘。例係應行議抵之案。可否准其抵銷。請旨遵行。如奉旨不准抵銷。毋庸查計。若准其抵銷。再行查明覈辦。○又

諭。吏部議處事件。奉特旨交議者。仍依定限於五日內專摺具奏。其各衙門自請議處。及叅奏議處者。事件繁多。若概用摺奏。未免煩瑣。均著照例具題。惟此內應專案具題之件。亦當予以限期。著定限二十日具題。如有違逾。將該部堂司官議處。道光四年奏定。文武官員。有同案議處者。如文職在先。則由吏

部主稿移送兵部會議如武職在光則由兵部
主稿移送吏部會議俱令依限送回。二十五年

諭前據御史張錫庚奏請飭覈對文簿以免積壓當有
旨交各衙門堂官悉心議奏節據各該衙門分別情
形或量為變通或照舊辦理均經定議具奏各衙門
文移往來皆有簿冊可憑如果實力稽查何致有延
閣不辦之事現既據議立章程嗣後著各照所議責
成該司員等詳細覈對認真辦理其有已發咨移而
承辦衙門日久未辦者內而大小衙門外而督撫均
著將所發文移註明日日一體查催係由何處捺閣

不難從此根究。立予嚴懲。經此次嚴諭之後。如該司員等仍敢漫不經心。任令不肖書吏。將所收文移。延閣科房。並不稟請標畫司到。以致積壓日久。不行辦稿。一經發覺。即將本任專管之司員革職。永不敘用。其承行書吏。立即鎖拿。交刑部治罪。並將該堂官等照例議處。○咸豐七年

諭。嗣後凡有加恩諭旨。均著於五日內行文。毋得遲延。稽查八旗事件限期。○乾隆二年覆准。凡各旗都統參領所辦事件。有未妥協以及遲延者。稽查該旗御史。不行查出參奏。別經發覺者。將查

旗之御史。照不行詳察。例罰俸六月。儻有瞻徇情面。明知錯誤。不行參奏者。照徇情例降二級調用。○三年定稽查內務府衙門。並上三旗之御史。亦照稽查八旗之例。不必逐年更換。如該御史有升遷離任等項事故。即令新補之人。辦理稽查。儻有遲延違限。經該御史查出題參。將承辦之郎中。員外郎等官。及徇隱之內務府總管。均照事件違限例議處。如該御史徇隱不參。照不據實陳奏例降一級調用。○嘉慶五年奏准內務府衙門事件。儻有遲延違限。稽查該衙門御

史查出題。叅如徇隱不叅降二級調用。道光四年奏定內務府衙門事件。遲延逾限如稽查該衙門御史失於叅奏。罰俸六月。徇隱者降二級調用。直省承辦。

欽部事件限期。順治十三年題准直省。

欽件限期。地有遠近。事有繁簡。直隸限三箇月。奉天同。山東。山西限三箇月半。河南限四箇月。江南。湖廣。陝西。延綏。通限五箇月。浙江。湖南。甯夏。通限六箇月。南贛限六箇月半。福建。四川。廣西。甘肅。廣東。通限七箇月。各令依限奏結。如事有限。

內難結者。聽該督撫按詳開事由。於限內題請展限。十八年題准。凡行查在外事件。按地方遠近立限。以文到為始。直隸。山東。山西。河南。陝西。限四箇月。江南。浙江。湖廣。江西。限五箇月。福建。廣東。廣西。限六箇月。雲南。貴州。四川。限七箇月。儻有繁重事情。限內不能即結者。許題明展期。其違限一月者。罰俸三月。違限二月者。罰俸六月。違限三月者。罰俸九月。違限四五月者。罰俸一年。違限半年以上者。降一級調用。一年以上者。降二級調用。二年以上者。革職。違限不及

一月者免議。至各部院題覆一應事件。違限者俱照此例治罪。其本章咨文送到日期。務於疏內註明。又議准。甘肅巡撫。照四川例。限七箇月報完。又議准。直省督撫。凡遇部院移行

欽件。必逐一查明。某部某事。係何月何日咨到。或前任督撫。已違限期。方行交代者。令其明白具題。康熙元年。議准。直省衙門事件。由督撫行司道府。司道府行州縣者。俱不得過二十日之限。若事不能如限。即結。亦必豫請展期。違者聽督撫糾參。照例治罪。三年議准。督撫題參遲延官員。必開明違

限月日。違者聽該部院糾參督撫。罰俸六月。其違限緣由。仍駁回查明。○九年議准。直省巡撫遇

欽部事件。以文到之日為始。通限以四箇月具題。其總督駐紮本省地方事件。照巡撫限期。統轄隔省地方事件。限六箇月具題。違限者罪坐督撫。不得分坐道府州縣等官。○又題准。陝甘總督所管甘肅。兩廣總督與廣東巡撫所管瓊州。雖係本省地方。相隔遙遠。應照隔省例。限以六箇月具題。○十五年議准。各直省事件。督撫違限一月者。罰俸三月。違限二月者。罰俸六月。違限三月

者。罰俸九月。違限四五月者。罰俸一年。違限半年以上者。降一級留任。違限一年以上者。降二級留任。違限二年以上者。降三級調用。又議准承辦欽部事件各官。均照定限辦理完結。如案情繁重限內必不能完結者。承辦官將此情由申詳督撫題明展限。如承辦官將易結之事。遷延不結。或將難結情由不豫行申詳督撫。經督撫題參。雖期限未滿及逾限不及一月者。將承辦官罰俸三月。至逾限一月及一月以上者。不論事件已結未結。將承辦官罰俸一年。督撫計月處分。二十三年議

准凡督撫新任接署事件。俱以到任署任日期
扣算。原限四箇月者。展限兩月。原限六箇月者。
展限三月。各遵照完結。又題准新任督撫有
欽部事件難結者。以到任日期為始。展限兩月。停其
具疏題請。四十六年

諭部院事務。科道官員。於每月稽查其完結與未完結
之處具題。其各省事務。並無稽查具題之處。以致錢
糧盜案人命事務。往往遲延數年數月。嗣後凡奉旨
之事。交與何官料理究審。完結與未完結之處。令該
督撫等於春夏秋冬四季奏聞。其各部所交之事。完

結未完結。亦令各部稽察。於四季奏聞。○五十二年
恩詔。內外文武官員。除大計軍政處分外。其現在議革
議降議罰戴罪住俸等項。各該衙門悉與奏明寬宥。
欽此遵

旨議定。違限初參各官。援

赦免議嗣後復以違限題參者。照初參例處分。若未
經遇

赦初參各官。復經題參者。仍照復參例議處。○五十
七年覆准。凡交代承審遲延。與追緝不力等應
參事件。該督撫不必另本具題。各照例限咨明

各部處分俱入彙題完結。○又覆准部駁再審事件。令該督撫虛心按律改正具題。承審官從前舛錯之處。免其議處。若駁至第三次。該督撫不為酌量情罪改正。仍執原擬具題者。該部院衙門覆覈改正。將承審各官。並該督撫交部議處。○雍正元年

諭各省已未完結事件。停其四季造冊奏聞。○五年覆准各省州縣奉到部文查審事件。定例均以督撫准咨日期扣算。四箇月咨題。州縣距省程途遠近不一。若俱一例扣限。參處似未均平。嗣後

奉部查審事件。除臺灣、瓊州、苗疆地方仍照定例遵行外。其各省內地。均以州縣奉文之日起。扣限四箇月。各題完結。其各州縣距省水陸里數。行令各督撫查明。造冊報部存案。於限滿各叅日。將里數各內聲明。各衙門照冊查對。以杜捏飾。遲延之弊。至各督撫接准部文。俱限於三日內。即行檄飭所屬。不得遲緩。如逾三日之限。照遲延例叅處。又督撫將部文行司。必由司而府。轉行州縣。未免遲緩時日。應令督撫行司之後。即飭該司。一面徑行州縣。一面仍行該道府。

轉行所屬。○乾隆十五年議准。凡都察院據呈
咨行案件。該督撫即將准咨日期先行咨報。一
面速飭承辦各官。依限查覆。果有難結緣由。即
於正限內。詳報咨展。如並無難結而逾限不行
咨覆者。照事件遲延例。分別議處。如限內任意
耽延。及至逾限之後。捏詞蒙混。託故申覆者。經
都察院參奏。將承辦官照蒙混造冊例。降一級
調用。轉報之上司。罰俸一年。不行詳察之督撫。
罰俸六月。○又奏准。官員辦理

欽部事件。逾限不及一月完結者。比照逾限不及一

月事未完結罰俸三月之例。量為酌減罰俸一月。○又奏准。凡接扣限期。均於初參限滿日。接扣二參限期。不得以接到部覆之日。始行起限。致滋延展。○四十七年奏准。官員承辦

欽部事件。逾限一月並一月以上者。仍照舊例罰俸一年。若遲延半年以上者。罰俸二年。一年以上者。降一級留任。○五十四年奏准。凡通行各省督撫。按依本地情形。詳細妥議案件。及奉部咨取駁查事件。俱以接到部文之日為始。除道路遠近。按例扣算往返程途外。統限二十日內出

文咨部。如有必須輾轉行查所屬。以及行款過多。應行造冊咨覆者。以一月造冊咨覆。有因報銷錢糧冊籍繁多。一時不能確覈者。即於限內咨明扣除。如有遲延。照例議處。新疆辦事大臣。遇行查事件。亦照此例。扣算議處。該部仍計各省程途遠近。按月查覈。其有例限已屆。尚未覆到者。即行嚴催。如承辦司員。不行查催。該堂官查參議處。儻部駁至再。仍含糊聲覆。即覈明本案題駁。將督撫及承辦之員。隨時查參議處。

嘉慶七年

諭嗣後各直省督撫。凡遇地方應辦事件。務須依限完結。不可遲延。至奉旨特交之件。尤當迅速辦理。若再有延玩。定當嚴行懲治不貸。○九年

諭嗣後各該督撫等於部行事件。總當嚴飭屬吏。上緊辦理。毋得玩愒從事。自干咎戾。○十二年

諭近來各省交審事件甚多。而奏結者甚少。該督撫於奉文之後。任意延宕。經年累月。怠惰因循。以致善良赴訴不休。而姦民告訐愈甚。獄訟之繁。皆由於此。第各衙門奏交咨交之件。其情事輕重。竟有不同。尚應分別覈辦。即如特旨交審事件。此與派欽差前往無

異何以欽差馳至該省無不迅速奏結而督撫承審之案動輒稽延即云案犯不齊亦無難勒限嚴提何得有心泄泄嗣後特交事件著該督撫於奉文之後隨時咨報軍機處自原告到省之日起依限審結即有因人證難齊或該督撫有公出事件不得不稍為展緩亦當隨案報明儻涉遲逾即行分別參奏其各衙門咨交事件亦著照此登記檔案依限飭催如違分別辦理至各省距京道路遠近不同案情亦繁簡互異即各省交審案件亦多少不一其應如何分別立限酌定處分並著吏部參考舊例定議具奏欽此

遵

旨議定。凡

特旨交審案件。以提齊人犯之日起。限兩月完結。部院咨交之件。以接奉咨文之日起。限四月完結。俱令該督撫親提審訊。不得有逾例限。如或因隔省行提人證。或該督撫有公出事件。限內實有難結緣由。係

特交之件。令其隨時咨報軍機處。係咨交之件。隨時咨報原交衙門。俟審結之日。仍於奏摺後。並咨覆文內。將例限起止。及曾經咨報展限若干月。

日之處逐細聲明兼報吏部查覈照例准其扣除。倘無故遲延逾限不及一月者將該督撫罰俸三月。逾限一月以上者將該督撫罰俸一年。如無故遲延至三月以上即將該督撫照任意耽延例降一級調用。如無故遲延至半年以上即將該督撫照易結不結例革職。○十六年奏准部院衙門咨交案件督撫因公務繁劇將情節較輕之案轉委屬員訊辦者應給予分限兩月。如有遲延議處逾限不及一月者罰俸三月。逾限一月以上者罰俸一年。如無故遲延至三月

以上者。即照任意耽延例。降一級調用。如無故遲至半年以上者。照易結不結例革職。其委員審辦遲延。每屆彙叅之期。將督催不力之督撫。藩臬併計覈議。將藩臬兩司罰俸一年。督撫罰俸六月。應令各督撫於每屆半年逾限未結者。即分別奏請議處。至關提人犯。務令各該管地方官迅速拏解。歸案審辦。免差至拖累。如有人犯潛逃。要證遠出。令該地方官確切查明。取具鄰族甘結。該縣加具切實印結。詳報上司備案。仍一面查明該犯貿易何處。及潛逃何方。詳報

關查。速即拏解。如逾限不發。分別議處。十八年諭。外省遇有特交咨文審辦各案件。如實有不能依限完結者。均著分別奏咨。以備查覈。即聲覆部院咨查事件。亦著將何日接准部文。何日咨覆。一併詳敘。違限者均予叅處。二十三年奏准。直省督撫於各部院查催事件。咨覆遲延。自十一案至二十案者。罰俸六月。二十一案至四十案者。罰俸二年。四十一案至六十案者。降二級留任。六十一案至八十案者。降四級留任。八十一案以上者。降二級調用。其由司道府州縣等官詳覆遲延者。仍

照承辦

欽部事件遲延例議處。道光五年

諭。御史劉光三奏請嚴定咨查直省事件。逾限不覆章程一摺。向來六部等衙門咨查各省事件。無論案關題奏。俱應依限咨覆。所以熙庶績而做泄玩也。如該御史所奏。近日外省接到部咨。大半視為具文。任意遲逾。案懸不結。以致書吏夤緣為姦。員弁規避取巧。弊端百出。著六部等衙門。將歷年咨查直省各案。派員逐一檢出。分別奏催咨催。如該省仍延閣不辦。即著查取遲延職名。參奏辦理。

欽定大清會典事例卷八十九

吏部

處分例

直省衙門事件限期

直省事件限期
盛京衙門

事件限期

新領取刷卷限期

行查外省職

直省衙門事件限期○康熙元年議准直省衙

門事件由督撫行司道府司道府行州縣者俱

不得過二十日之限若事不能如限即結亦必

豫請展期違者聽督撫糾參○二十三年議准

州縣官易結之事遲延不結違限三箇月者降

三級調用四箇月者革職○二十四年議准凡

本章揭帖。不論密題並平常事件。俱令原題衙門計程定限發行。揭帖內即註明日期。於日期上鈐蓋印信。以便稽察。所給火牌。令經過驛遞用印。即填註所到起發日時。同本章投遞通政司。至交與驛遞齋送本章。所給傳牌。亦令經過驛遞填註所到起發日時。投遞通政司。查明有違限者。將提塘承差交該部治罪。如有作弊事情。從重究擬。若原題衙門於本章揭帖批迴內。不寫日期。到京之後。在印信上填註日期者。除提塘承差交部治罪外。將原題將軍督撫提鎮

等題參議處。○三十七年覆准嗣後督撫題參
違限者務將易結不結情由詳查註明題參照
違限月日定例議處如督撫將易結之事以為
難結不行註明蒙混題參者經部查出易結不
結情由將該督撫照徇庇例議處。○乾隆十八
年議准各省官員到任日期該督撫每月彙報
一次其中有即應升用者上月到任之官務於
次月報部以憑升用其廣東瓊州雷州廉州三
府距省較遠瓊州府准展限一月雷州廉州二
府准展限半月上月下旬到任官准彙入下一

月詳報。儻有不按月咨報者。照事件遲延例議處。○二十三年奏准。各省一切彙題事件。限開印後兩月內具題。如有遲延。該部隨本查叅。交部議處。○二十七年覆准。各省承緝承查承追承變交代。各督撫按限查叅。俱停其扣除封印日期。若封印期內。有一切犯逃之案。地方官立即籤差追捕。通詳各上司。分關鄰境地方。一體查拏。各督撫按限分別查叅。亦不得扣除封印日期。○三十年奏准。各省督撫移咨外省查緝追變等項。俱以文到之日。按各定例限期。令承

辦之地方官依限完結。如有推諉延挨逾限不行查覆關解及追變不力等弊。即令該管各上司按限咨參。照例分別議處。○三十三年覆准。凡官民呈請上行事件。如起文赴選赴補呈請開復及民人留養贖罪等項。俱以呈報之日為始。限三月分別咨題完結。並將具呈月日聲明。以憑查覈。如有逾限。照

欽部事件。遲延例議處。儻原呈內實有舛錯遺漏。應行駁查者。俱將本案內初次呈報及批駁換詳月日。摘取簡明情由聲敘。如有毛舉小疵。故為

駁飭以致遲延逾限並捏改月日者按遲延日期照例議處係故為駁飭再罰俸六月係捏改月日再罰俸九月○三十七年奏准各省彙查遣犯及班館門包衣織脫鞞抽改綱目發明廣義民穀數護送銅斤工程已未完扣展公出通省城垣改修船隻坐補防禦收繳烏槍禁用紙繩著賠盜賊等十五件及河灘並無新添村莊陶北河有無淤墊二件於每年十月內截數咨報軍機處及該部均限十二月初間咨齊即由軍機大臣會同該部彙開清單於年底先行具

奏仍交部分別覈議具題。至常義各倉實存及甄別教職佐雜千總二件。及拏獲盜竊功過各屬倉庫無虧藩庫實存二件。於每年十一月底出咨。不得遲至臘底正初。均由軍機大臣彙覈查辦。道光二年改定由各部分別覈議照例具題其各省咨到各件。出咨日期有無逾限彙覈奏。

諭。嗣後著通行飭禁。無論大小文武各官。現有去思德政等碑。俱查明什毀。該督撫務須實力查辦。毋得視為具文。並著每年年終奏聞。○五十一年

諭。戶部彙奏各直省錢糧報銷未結事件一摺。內有經部駁查二次未覆。及至三次未覆。各省動用錢糧報銷。俱有定例。該督撫等自應覈實速行具題。乃經部駁查後。復輾轉行查。至數次尚未題覆。實屬疏玩。所有駁查二次未覆者。姑免議處。其駁查三次尚未題覆者。俱著交部議處。著為令。嗣後該督撫等務須覈實查辦。妥速。○五十八年

諭。前因各省士子。有肄習坊間刪本經書一事。降旨令各督撫嚴行查禁。將此項刪本起出。解京銷毀。節據該督撫等陸續查繳。但恐日久懈弛。不可不再申厲。

禁以端士習而崇實學。夫經籍自孔子刪定。豈容後人妄為芟節。皆由不通士子。或落第之人。不能通經致用。遂以弋名之心。轉而弋利。往往於經書內。避去諱用語句。任意刪減。或標寫擬題。以為庸陋士子場屋揣摩之具。而坊間即為刊刻傳播。彼此沾潤。此等貪鄙之見。不特非讀書上進者所為。亦且有玷士林。自慚名教。各督撫當飭屬留心查辦。使若輩知所儆懼。自不敢復蹈故轍。而坊間既無此種書本。亦無從刊布漁利。况六經為聖賢垂教之書。字字俱有精義。乃竟臆為揀擇。作此刪本經書。而躁進之士。又欲於

糟粕之中。另標捷徑。不但失前聖立言之意。於士風亦大有關係。想自用制義取士以來。或即有此項刪本經書。亦非起於今日。然不清其源。安能禁其流之。不滋甚耶。該督撫若以此次查繳之後。即視為具文。弛其禁令。則牟利書坊。又復漸行出售。輾轉流傳。終難盡絕。嗣後仍著落各省督撫嚴飭所屬。認真查禁。並將繳過刪本經書數目。及有無傳習之處。三年彙奏一次。○嘉慶十一年

諭各省審辦事件。懸宕甚多。上司既輾轉派委。致稽時日。而州縣復不以地方公事為重。每日自辰至午。在

上司衙門趨承伺候精力先已疲耗以應酬之餘。辦理公事勢不能不草率因循。多所積壓。殊非所以整飭吏治。此種怠玩習氣亦非獨外省為然。近來京中部院各衙門辦事亦覺遲緩積壓。司員等到署不早。難免怠惰偷安。朕孜孜勤政。近皆秉燭閱事。從不憚勞。乃大小臣工於入內遞事之日。尚知起早進朝。而尋常進署辦事。輒遲至巳刻以後。是豈急公趨事之道。至外省督撫等偷安晏起。及屬員等伺候上司。彼此貽誤公事。更屬不免。嗣後務當痛改積習。振作有為。於應辦公事。認真經理。慎毋仍前遲誤積壓。視清

釐積案為歷任交代之具文。庶吏治民生稍有裨益。

○十二年

諭外省詞訟案件。如果大小各衙門。悉皆認真經理。各自清釐。自可無虞。壓積乃州縣官狃於積習。一味怠惰偷安。置民事於不問。以致小民冤憤莫伸。層層上控。而上司衙門。又不過以批發了事。日久宕延。前任付之後。任塵案堆積。漠不經心。是以近來京中控案日多。都察院及步軍統領衙門。具奏發審之件。幾至每日皆有。總由地方官因循疲玩所致。各省承審案件。動以人證不齊為詞。試思案證如果不齊。何難勒

限催提。若催提不到。原當照例參辦。如欵差審辦案件。一經到彼。從無因案證未齊。延閣不辦者。乃無識者流。每以伸理控案。易啟百姓刁風。殊不知刁風之長。正係地方官審斷不勤之故。如果地方官勤於聽斷。並無壅滯。則案情立分虛實。在銜冤控告者。既可立時剖雪。自不致再行赴懇。若姦徒逞刁捏控。一經審明。速行懲辦。凡在地方不法之徒。孰敢輕為嘗試。今案件延閣不審。良民既多負屈。而姦徒懷私挾詐。遂得私意訐訟。陰快其挖累之計。效尤無已。實由積案不清。有以啟之。嗣後外省大小各員。務當隨時清

理案件毋得仍前闕宕。儻再有積壓多案。延不審結者。一經查出。必當從嚴懲治。慎無泄泄。○十七年

諭。刑部奏各省秋審後尾到部遲延。請旨飭催各省秋審後尾。定例限於四月內具題到部。本年將屆五月下旬未到者。尚有十一處。而其中山東山西直隸熱河道里俱近。亦復遲延。恐不免有意觀望。私向部中書吏探聽實緩情節。再行改合。冀免將來失入失出處分。不可不嚴防流弊。所有此次辦理遲延之山東山西直隸各督撫及臬司。並熱河都統均著交部議處。其貴州廣西廣東福建湖南湖北浙江各督撫及

臬司均著交部察議。並將此旨由四百里發往。令其速行具題。達部嗣後俱著遵照定限。如有遲延。刑部查叅。即照此次一律懲處。欽此遵。

旨議定。各省秋審後尾。定限於四月具題到部。如有遲延。經刑部查叅。將道里較近之直隸。山東。山西。河南。熱河。都統。

盛京刑部。照事件遲延例議處。道里較遠之安徽。江蘇。湖北。湖南。浙江。江西。陝甘。四川。福建。廣西。廣東。雲南。貴州等省。照事件遲延例減等議處。

○二十五年

諭戶部題銷恩賞直隸兵丁錢糧一本嘉慶十二年恭

奉

皇考高宗純皇帝實錄

聖訓前赴盛京尊藏禮成朕普錫恩施內有賞給沿途
護送兵丁半月錢糧一款乃遲至本年始行題銷計
已越十三年之外省於應行報銷事件任意耽延
因循疲玩相習成風而直隸為尤甚屢經降旨訓飭
恬不知改非明定處分不足示儆著吏兵二部酌議
嗣後各省題銷事件遲延在三年以內者免議其有
越三年以上者分別議以罰俸六年以上者分別議

以降調九年以上者。即行革職。酌定條款。奏准後通飭各省一體遵行。欽此遵。

旨議定。各省題銷錢糧事件。由戶工二部覈明月日。遲延在三年以內者免議。如遲延在三年以上者。將該督撫罰俸一年。四年以上者。罰俸二年。五年以上者。罰俸三年。六年以上者。降一級調用。七年以上者。降二級調用。八年以上者。降三級調用。九年以上者。革職。係藩司承辦遲延。即將該藩司照此議處。如題銷時尚在三年以內。因部駁以致遲延者。除扣去往返程限外。統計先

後遲延月日。按其所逾年限。各照本例減等議處。若題銷時已在三年以上。雖經部駁。止准其扣除往返程限。仍按其所逾年限。各照本例議處。

盛京衙門事件限期。○康熙二十二年題准。奉天將軍府尹及

盛京各部。一切移部咨文。兩箇月回文不到。即咨部請查。甯古塔將軍。一切移部咨文。三箇月回文不到。亦令咨部請查。逾此限者議處。○雍正元年覆准。

盛京一切事件。均照京城之例。勒限完結。○乾隆十七年覆准。

盛京各部衙門。辦理事件。禮兵工三部。並將軍等衙門。限十五日完結。註銷。戶刑二部。限二十五日完結。註銷。如遲延未完者。該巡察御史查叅。照在京衙門事件。遲延例議處。其行查及會稿。條禮兵工三部。並將軍衙門。各限五日送回。戶刑二部。各限十日送回。主稿衙門。准其將行查分會日期扣除。如逾限送回者。該主稿衙門。知會該巡察御史題叅。行提人犯。以人文覆到之。

日扣限完日註銷如違限未完該巡察御史題

參。謹案巡察御史續經裁撤道光四年改定。如有遲延及逾限送回仍均照前例議處。

直省事件展限○康熙二十二年議准督撫監

臨科場日期准其按日扣限隔省出境者准令

題請展限若有公務在本省內不准展限○二

十三年議准督撫新任接署者均以接署日期

扣算原限四月者展限兩月原限六月者展限

三月完結○又議准布政使暫行護理巡撫印

務者不准展限○乾隆三年覆准嗣後凡通行

各省督撫提鎮按依本地情形詳細妥議及查

議案件。該督撫於四月六月正限之外。若事理
易結者。展限兩月。事理難結者。展限四月。該督
撫分別咨題事件。按限完結。○十五年奏准。通
行各省查議事件。凡專行一府一州者。限四月
完結。原屬寬嚴允協。毋庸酌減。應將通行各府
州查議事件。易結者。定限六月之外。不准加展
兩月。其難結者。六月之外。加展兩月完結。不准
展限四月。至有不需地方官查議。在省司道可
以覈定聲覆者。毋庸照四月扣限。應酌減兩月。
以兩月扣限題咨。○三十年奏准。各省難結案

件咨部展限時。並報明科道事結後題覆本內。聲明註銷。科道於年底分別已未完結。造冊彙奏。其有久不題覆。又不展限者。科道查明題奏。○五十五年議准。督撫兩司到任前任內承審承查等案。俱以到任日期。扣算前官歷過日期。准其扣展。歷限過半者。准其扣半加展。至

欽部緊要事務。仍速行完結。如有難於完結者。展限一月完結。○嘉慶五年奏准。道員任內事件。如值入闈充監試提調者。按日扣限。因公出所屬境內者。申請展限。未出所屬境內者。不准。○又

奏准知府以下。因公展限。分別是否出境。與道員同。道府以下。舊任內事件展限。與督撫兩司同。

邊遠事件展限。○康熙九年議准。各省苗疆。係邊遠地方。承辦事件。於正限外。展限兩月。○又題准廣東瓊州。

欽部事件。限六月具題。其命案。於六月正限外。展限兩月。○二十四年議准。福建督撫管理臺灣府事件。因阻隔重洋。以八箇月為限。○二十五年覆准臺灣。

欽部事件。限十箇月具題。○乾隆十五年議准廣西
苗疆潯州府屬之武宣縣。南甯府屬之宣化縣
橫州。永淳縣。柳州府屬之馬平縣。雒容縣。柳城
縣。羅城縣。融縣。懷遠縣。象州。來賓縣。思恩府屬
之賓州。遷江縣。上林縣。慶遠府屬之思恩縣。共
十六州縣。湖南苗疆永州府屬之道州。甯遠縣。
永明縣。寶慶府屬之邵陽縣。武岡州。新甯縣。辰
州府屬之沅陵縣。瀘溪縣。辰溪縣。溆浦縣。沅州
府屬之黔陽縣。麻陽縣。郴州屬之桂陽縣。桂東
縣。宜章縣。興甯縣。靖州。並所屬之會同縣。澧州

屬之永定縣。桂陽州並所屬之臨武縣藍山縣。二十二州縣細察情形與內地無異。不准展限。其餘仍照舊加展。○二十五年覆准廣東瓊州府屬承辦。

欽部事件及承查等項展限一月。臺灣展限兩月。領取刷卷限期。○乾隆二十年奏准在京大小衙門領取刷過卷宗定期於每年二月內河南道監察御史照衙門次序豫定領卷日期知照各衙門令各經承按知照日期赴河南道衙門領卷該御史查明即行給發儻河南道衙門書

役有藉端勒索等弊。交刑部治罪。該御史知情

者革職。不知情者照失察例議處。至各衙門不

依期赴領。該御史照例查叅。道光四年定。遲延不及一月者。罰俸

一月。一月以上者。罰俸三月。若該衙門依期赴領。該道不按

期給發。亦照此例處分。道光四年定。將該道罰俸一月。若給領

之時。案卷有遺失不全者。照遺失科鈔例議處。

道光四年定。罰俸兩月。○三十年奏准。官員送刷文卷數

目舛錯者。罰俸三月。

行查外省職名限期。○乾隆三十三年議定。各

部院查取外省職名時。將限何日到省之處。於

封面上註明該省以接奉部咨之日為始定限
十日出文咨送。如有必須行查所屬者。即按轉
查程途月日若干。逐一扣明咨部。亦將限何日
到京之處。於封面上註明。如有逾違。照事件遲
延例分別議處。直隸總督衙門。至京三百六十
里。限四日。熱河副都統衙門。至京四百二十里。
限四日。察哈爾都統衙門。至京四百一十里。限
四日。山海關副都統衙門。至京六百七十里。限
七日。山東巡撫衙門。至京九百六十里。限九日。
青州副都統衙門。至京千里。限十日。歸化城副

都統衙門。至京千一百二十五里。限十一日。綏遠城將軍衙門。至京千一百二十五里。限十一日。河東河道總督衙門。至京千一百四十五里。限十一日。山西巡撫衙門。至京千二百五十里。限十二日。河南巡撫衙門。至京千五百四十五里。限十五日。

盛京將軍。奉天府府尹衙門。至京千五百里。均限十五日。漕運總督。江南河道總督衙門。後裁。至京千九百七十五里。均限二十日。兩江總督。江甯將軍衙門。至京二千二百六十一里。均限二十

三日。京口副都統衙門。至京二千三百十二里。
限二十三日。安徽巡撫衙門。至京二千五百二
十六里。限二十五日。陝西巡撫。西安將軍衙門。
至京二千五百五十里。均限二十五日。江蘇巡
撫衙門。至京二千六百七十里。限二十七日。湖
廣總督。湖北巡撫衙門。至京二千八百二十七
里。均限二十八日。吉林將軍衙門。至京二千八
百八十二里。限二十九日。浙江巡撫。杭州將軍
衙門。至京三千零五十里。均限三十日。乍浦副
都統衙門。至京三千一百二十里。限三十一日。

江西巡撫衙門。至京三千一百九十六里。限三十二日。荊州將軍衙門。至京三千三百八十里。限三十四日。湖南巡撫衙門。至京三千七百五十七里。限三十七日。黑龍江將軍衙門。至京三千九百八十三里。限四十日。甯夏將軍衙門。至京四千零五十里。限四十日。陝甘總督衙門。至京四千一百十五里。限四十一日。涼州副都統衙門。至京四千三百里。限四十三日。四川總督成都將軍衙門。至京四千七百七十里。均限四十八日。閩浙總督福建巡撫福州將軍衙門。至

京四千七百七十五里。均限四十八日。貴州巡撫衙門。至京四千九百里。限四十九日。廣西巡撫衙門。至京五千四百六十九里。限五十五日。兩廣總督廣東巡撫廣州將軍衙門。至京五千五百七十里。均限五十六日。雲貴總督雲南巡撫衙門。至京六千零二十五里。均限六十日。○嘉慶五年奏准。外行事件。該部院按照各省程途遠近。按月查覈。其例限已屆。尚未覆到者。即行嚴催。如承辦司員。不行查催者。罰俸兩月。○光緒十年議定。甘肅新疆巡撫衙門。至京八千

四百九十里。限八十五日。○十一年定。臺灣巡撫衙門。至京七千二百五十里。限七十二日。

新疆登答錢糧案件。○乾隆三十六年覆准。凡新疆地方辦理登答。其事關錢糧冊籍者。如乾隆三十年以前案件。伊犁烏什烏魯木齊。以奉文之日起。扣限十月咨覆。塔爾巴哈臺葉爾羌喀什噶爾。以奉文之日起。扣限八月咨覆。關展庫車。哈喇沙爾。以奉文之日起。扣限六月咨覆。其三十一年以後。登答冊籍。俱各遞減。三月咨覆。至往返日期。及行查案由。俱於文內聲敘。統

入正限之外。並照例扣除程限。其從前未結一切登答案件。俱照此扣限辦理。至無關錢糧一切尋常

欽部事件。仍照定例遵行。

謹案葉爾羌。喀什噶爾。聞展。庫車。哈喇沙爾。均於光

緒年間。改隸新疆省。分為廳縣。